



Lailong (L) Kochuam piting ah lankai ni.



C. Munkot Kochuam laklut ni (Left). C. Munkot Biak In (Right)

7a.

If undelivered please return to - Manipur Area Office,
 P.O. Box - 107
 D. Phailian,
 Churachandpur - 795128
 Manipur, India



PASTORAL MINISTRY NGAI PAWIMAW THAK HITIU

- Kipan Inla Maicham Siam in
- Pumkhat Hidi'n Jesu'n Ei Dawtpiak
- Pathian Thu Zawm

SEPGIM CHU CHAWLNA NUAM A HI

Thingtâng gam la chia khak ahileh, a tangpi a chun lamto haksate zosia i zawt tawp takleh khawthîlna mun nuam deu a khin khangdaw a la um sek hi. Thachawl takah lamto hung zawt ah zia khangdaw chung ah kichawl te chun thigua ngât hiau cha hung nung chu a chawl uh a dam ah, nuam a sa ma mau hi. Maleh a suk lam ah hung thachawl khello te chun bang tak in a ngâi kit puau hi. Pu L. Keivawm IFS chun, India khawpi zosia leh khawvel ah khawpi minthang zosia ka fang suak ta hen, Senvon ah khatvei lawmpi kisua chang ah uisa ka mekhawm uh kha a nuam pen ka sa nalai hi a tii.

Lalpa grep huan ah na i sephawmnau ahin le, a um awl mai mai te kipakna sang in a gim leh chawlte kipakna a sang zaw sek a, malsawmna chuam chuam i dawn hun takleh le, a gim leh chawl te ma khan nuam a sa bik sek uh a hi. Sepgim chu chawl na nuam a hi gual ma in, sepsa chu kipakna'n zui zel ding a hi.



Kochuam Huang

Manipur Area Committee

February 9, 2022 ah khan Committee Room, Synod Office, Aizawl ah Manipur Area Committee nei a hia, Manipur lam apat hi henla, Mizoram apat palaite hileu, a chiakim thei ua, meeting fel tak ah matzaw a hi.

Synod Finance Committee

February 17, 2022 ni khan JM Lloyd Hall, Synod Office ah Synod Finance Committee a um ah, ei lam apat in Rev. S. Lama Vaiphei, Co-Ordinator a va pang thei hi.

Synod Executive Committee (SEC)

February 22-24, 2022 sung ah khan JM Lloyd Hall, Synod Office ah Synod Executive Committee a um ah, ei lam apat in Rev. P.B. Zosaphara, A/S, Rev. S. Mangminthang leh Rev. Lalpiaklian te a va pang thei u'i.

Kochuam piting ah lânkai

February 20, 2022 (Pathianni) khan Rev. Thanglianlal, Moderator, Tanggam Presbytery chun Leijangphai Pastor Bial ah Lailong (L) Branch Church chu Kochuam piting in a lalut hi.

Lailong L. Kochuam statistics:

Pawsal	25
Numei	29
In zat	8
Dan haw kim	30

Kochuam ah lawplut thak

C. Munkot Christian Church chu Lamka Pastor Bial in a chiata ni 31/01/2022 (Seppatni) ah khan Programme siam in, Bialtu Pastor Rev. Vanlalchhuanga'n Lawplutna leh Branch Church ah hawwna a nei hi.

C. Munkot Kochuam dinmun tangpi:

- Inkuan 40 +
- Pawsal zat 84
- Numei zat 80
- Gawpkhawm 164
- Piting 98
- Naupang 66
- Kochuam Upa Neilo

HINNA VÂK

Manipur Area Finance Campaign

February 03,2022 ni khan Minipur Area Finance Committee chukhawm in Finance Campaign sutzawp ding dan a guanggal ua, ziagual ahin programme siam a hi.

	CAMPAIGNER GROUPS	CHIANA DING BIALTE	
		PHASE-II (3/4/2022)	PHASE-III (8/5/2022)
1	Rev. PB Zosapthara, A/S - (Leader) Upa Lalminsang, Hill-Town Tv. Songliansang, O/A	Imphal	-
2	Rev. S. Lama Vaiphei, Co-ord - (Leader) Rev. Lalremliana Colney, D.Phailian Upa Mangkhokhai, Gangpimual	Sugnu	Jiribam
3	Rev. Khaisonthang, Kawlhen - (Leader) Rev. Nicky Lalremmawia, New Lamka Upa Ginkholian, S. Munnuam	S. Kawtlian	Lamka
4	Rev. Ngurthanmawia Sailo (Leader) Upa Tinliankham, Gilgal Upa AL Thanga, Langol	B. Phainuam	-
5	Rev. K. Neihisial, S.Kawtlian - (Leader) Rev. Khuplemlal, Leilon Upa Genminlun, Pengjang	Panglian	S. Munnuam
6	Rev. S. Khaikholam, Kangvai - (Leader) Rev. C. Lalrinliana, Kangvai Pu Manglallemlal, Kangvai	D. Phailian	-
7	Rev. S. Mangminthang (Leader) Rev. Siamlaron, Phailianbung Upa Kamthang, Sugnu Tribal	New Lamka	Chingmei
8	Upa S. Tinal, D.Phailian - (Leader) Rev. Summinlian, Sugnu Pu Lalbiaklian, O/A	Kangvai	Dumlian

PASTORAL MINISTRY NGÂI PAWIMAW THAK HITIU

*Rev. Thanglianlal
i/c MunpiPastor Bial*

Thumapui: I thupi'u "Pastoral ministry ngai pawimaw thak hitiu" ti hi thupi pawimaw ma ma, ei uh Manipur area kochuam a ding ah pawimaw diak hi in ka ngaitua hi. Zia chungchang article zik ding hin huphulna liantak kanei a, hun kibichil tak kâl ah zik a hi ziakin a kimlo leh buting zolo tampi um ngei ding a hia, simtute'n lei hiatthiamnau ka hun dawn masa'i.

I. Pastoral Ministry umzia: Pastoral ministry i tiu hi kochuam kietkawlna lailung pen genna a hia, Kochuam leh Biakin tawsaisan a i nasep khawmna zosia'u a kaw k a, zia chu Kochuam kivaihawmnate, Pathian thutak mangcha kochuam chawp nate, leh i kivaipuak dante zosia a huap suak hi.

Pastoral ministry hi gamdang Presbyterian kochuam te chun Pastorte nasepna ti'n a kawi deu tangpi ua, Ei uh Mizoram Synod kochuam hin vang Pastorte leh Upate nasepna ti'n i ngai ui. Zia ziak tak a hin, Pastorte leh kochuam Upate nasepna hi na pawimaw ma ma gel a hiu. Huapljan leh chawmkim tak ah gen ding a

hi chun Pastoral ministry hi Pastorte leh Upate nasepna in a huap khak Kochuam nâ pumpi genna vek a mat a hi.

II. Pastor leh Upate dinmun pawimawna: Thuthunglui a Zawlneite khan a hun lai ua mipite khawsak dan a hechian ma mau a, a sakhaw dinmunte'u, Politics dinmunte, Social leh economics dinmunte a hechian ma ma un Pathian thute hangsan takin a gen sek ui. Tulai Kochuam hun a hin zawlnei chuam a um ta pua, Kochuam ah Pastor leh Upate hi zawlnei nasep a hi mai tau. Khawvel a hin Pathian in a kochuam a dindaw k a, zia enkawl ding leh puihuai ding

a chun Pastorte leh Upate hi a guat a, a ko ah, a sep dingte a pia, zia mawpuakna a lawtin theina ding a chun kochuam enkawltute hin a dinmun uh a hiatchian ma ma'u a ngai hi.

I Kochuam Dan bu (PCI Constitution) chun, Pastorte leh Upate dinmun leh a na chantum uh zia gual a hin a taklang hi. Upate chu, hotu; Thagaulam hinkhuate, vaihawmna lam ah te, kochuam sum suktupna lam ah te mawpaw ding ah namdet a hiu. (Danbu II.6.1.). Ziagual ma chun Pastor leh Minister te hi Kochuam hotu; Thugente, Sacrament guanggalte, thagau lam thil enkawltu, ziltiltu, khrista taksa sukpitin leh kochuam ah vaihawmna dik tak ngaitua dingte a hiu ti in a gen hi.

III. Sepkhawmna pha a pawimaw'i: Kochuam ah Pastorte leh Upate chanvo leh mawpuakna haw hi lak khen theilo tuk ah kihel khawm lem lum a hi ziakin a neu zaw a h'em a lian zaw a h'em umsak thei digual a hi pua, khat umlo ah hitheilo, kipanpitua ngai ma ma a hiu. Kochuam

Belampu gel a hiu a, kithutuak takah semkhawm ding, Mosi bankhamta, Aron leh Hur te'n a panpi gual ua khan kipanpitua a kochuam etkawl nasem khawm ding a hiu. Kochuam kiti hi Khrista tundaw kochuam a hia, a sungah mite lemtuak a ngai sek ui. Mitin a mawmaw teu piak kim chiat hi thil pawimaw tak leh Belampute haw sepkhawm na apat um thei bep a hi. Kochuam etkawl na a hin ama sep ding, ama mawpuakna bik tite a um chuam pua, sum etkawl nate, Thugen leh ziltilna te, kochuam vaihawmna lam a te hin Pastor leh Upate hi sepkhawmna pha a pawimaw'i.

Sepkhawmna pha siamtu pakhat chu kihiatthiamtuana hih a hi. Dinmun kihiatthiampiak lona hin kizatualonate, ki awimawnate, lungthim kisuknat tuanate a siam sek hi. Hiatdan, thiam dan kibanglo tak tak ahiu, himaleh Lal Jesu Khrista leh Thagau Thiangtho zal ah kona chang leh semkhawm zel a hiu. Kochuam enkawltute sepkhawmna pha a um phat

tak leh kochuam masawna, hatna, pumkhatna a tung seka, alangkhat lam ah, midang pawimawlo gualah mani bep kingai pawimaw a, midang tawh semkhawm theilo a um chun ama bep buailo in kochuam sungle a chawkbuai sek hi. Kochuam enkawltute hin sephawmna pha i pawimaw ma ma ui.

IV. Pastoral ministry
hin a huap let ma ma zia kin kochuam ah nasepna him him a pawimawlo a um pua, tuhun a hin genkimlo ding himale hinle, ngai pawimaw diak dingte tamlo vak taklang hitiu;

1. Kochuam venbitna lam:
Kochuam mite venbit hi Khrista thupiak a hi. Lal Jesu'n Belam vengtu tekhinna a mat hi eimau kietchianna'n mang kit hitiu (Jn 10:12). Belam khenkhat chu an khawp khamlo, an piak hawi ngai, khenkhat kuak sungah khelut, amau pawt daw k theilo pawtsak ngai, khenkhat vakmang gamla, va hawldaw ah puikit ngai te a hui. Belampu kilawfate chun sa lau um lak in a taimang san sek ui, ahinlah Belampu

pha chun ahileh a hinna a lân ngam hi. USA a overbrooke Presbyterian kochuam member 900 vel umna ah a Pastor teu chun "Ka mite'u 2 vei tiang a hung kikhawp lo ua leh haksatna la nei uh em? ti'n ka dawng ngal sek ui" a tiu a hi. Kochuam venbit hi i nasep kul ma ma a hi ti zia hin a kilang thei hi. Kochuam venbitna kawng pakhat a gen sek uh chu zingkal pauchap ah pan sek hi a hi. Zingkal pauchapna ah taima takah pang sekte chun kochuam sungah panpi ngai leh venbit ngai tam tak a mu sek ui. Kochuam enkawltute hin zingkal pauchap (devotion) hi ngai pawimaw thak hitiu.

Kochuam venbit zawlo hi thil khaw k ma ma a hi zinglai in, zia sangah khaw k zaw diak chu venbit hawilo hih a hi a ti sek ui. A tangpi ah kochuam pawtsan/nusia te hi kochuam ah chanvo piak lo zia k leh ngaisak zawlo ahi zia k uh a hi nuam ten hi. Kochuam ah lut leh pawt i nei zingua, venbit nasep hi hawi bawl sem leu hin bit deu ngei hitiu. Tulai tiang a hin kochuam sungah

ziltalna diklo i nei zing ua, Aadhar card chungchang ah te, hun nunung gindan thu ah te, Covid vaccine chungchang ah te thutak/thudik hesuak lote a puisiau ah, kochuam Upate nasan a bang diak puau a zia hin kochuam sung ei sukha ma ma a hi. Zia mite venbitna lampi pawimaw ma ma pakhat chu, Bible leh i kochuam thugin uh hetchian ma ma hih a hi.

2. Kochuam Ngaisakna lam: Kochuam etkawlina ah panlakna ding pawimaw tak pakhat kit chu mimal leh sungkuan tin ngaisak hih a hi. Khawitak mun ah le kimuna zosia ah min ngeiah kiko ziang thei khawpin kihechian ma ma thei leu hin kizamsan ziang um tam puan ah. Mel i kihiat bep uh hilo in Taksa lam leh Thagau lam kihiat piaktuana zalah kingaisakna hin kochuam sung a sunuam chuam ma ma ding a hi. Kingaisak i ti phatleh kawng tamtak a um ah, zia a nuai ah te hi tepte ding in a pawimaw hi-

i). Inchawt habawl hitiu: Pastor leh Upate Bial fan dan

hi Sakhi pi gamfang gual mai hi deulo in ngaisakna neitak pum ah bawl sek ding a hi. Khatvei chawt ah sawt pipi cham sangin chuan mun leu hin a hawi zaw diak hi.

ii). Damlo kan leh gentheite sawmdawl: A diakah damlo leh genthei te hi kanthak ah panpi ngai ma ma te a hiu. Pauchap piakna bep hilo ah sum leh pai lamah le a haksa diakte panpi thei sek leu hin.

iii). Biakin kai ngailote: Khamthei thil bawlte, Zu leh sa ah kihelte haw hi pampai mai lo in amau hi Biakin lam ah pulut theina ding lampi ngaitua zing pumah ngaikhawkna liantak piak dingah pha a hi.

iv). Siatni, Phatni: Mimal tin leh Insung tin ah hin vangsiatna leh vangphatnate, lawtin leh lawsapnate a tung zing a, ziagual hun a hin a kipaknateu kipakpi ah a thawknateu thawkpi ah, lungngai lai leh kipak lai ah ngaisak zing dingah kisa zosa um zing a pawimaw ma ma hi.

Zia a chungah kigente khel a hin Pathian thu lam ah haksatna neite ei dawt thei dingua ala

kimansa zing thei leu hin, a pawimaw'i. Kochuam mineu pente tiang a dingah kimansa um zing hi thil pawimaw ma ma a hi.

3. Kochuam chawpna lam:

Kochuam chawpna a hin anpha i piak chun damin a hisel ua, chawpna anphalo piak khak a hi chun zawngkhal in hisel theilo ding a hiu. Chawpna anpha pen chu Bible hih a hi. Ziaziakchun Bible hi sim tam in hiattam gua hitiu. Kochuam chawpna pawimaw ma ma khat kit chu ahileh, Kochuam kivaipuakna hi a hia, kivaipuakna dante haw hiat hawi ma ma ding a hi. Pulpit thugen hi mitin thagau chawpna a hia, ziatak ahin Pathian thu buting tak genkim kuat sek ding a hi. Pathian thu khen khat ual diak nei a h'em, a khen limsaklo a h'em i hi chun kochuam hi chialeng ngei ngei ding a hi. Chuleh Kochuam sungah Pathian thugen ding ah pawlam mi haw thugen ah ko ching vet tei hi khenkhat in a chingua, a phalo khawp mai hi. Kochuam enkawltu thugen zing sekte hin pan lathak hitiu.

I Kochuam Pastor leh Upate hi Pathian thugen dingah titlo a um

puau, Pastorte diak hichu zilmi a hiu. Pathian thu haksa hilchian kawngah te, Bible chang leh thu pawimaw hawldaw kawngahte, Pathian thugen ngaithatute hinna ah umze nei tak gendaw kawng ah te, dawt tâk leh ngaithak tâk hiding in kochuam te'n ei dawi ma ma ui ti hian pan lathak hitiu. Bible leh Theology lamte, Devotional bu lam te hi ei panpitu hawitak a hiu a, zia haw hi pauchapna tawh i sim tam phawt chun, Pathian in ei mang ngei in ah. Kochuam chawpna lam a hin i lungthim teu seng tam deu deu in ngai pawimaw thak hitiu.

4. Committee/Kivaihawmna

lam: Presbyterian kochuam hi vaihawmna mangah kipua leh kienkawl kochuam i hiu a. Committee leh kikhawmpi ah vaihawm sekte i hi ziakun kochuam puitute chu vaihawm thiam hî a ngai hi. I kochuam a hin Kivaihawmna sawng 4 i nei ua, ziate chu; Tualsung kochuam committee, Bial kikhawmpi, Presbytery leh Synod khawmpite a hiu. Ziate chung a hin Presbyterian Church of India General Assembly i nei kit ui. Zia tilo ahin Kochuam Numei

HINNA VÂK

Pawl leh Khristian Khanglai Pawl leh Committee dang dang te a hin kivaihawm sek i hui. Vaihawmna lam a hin kochuam enkawltute hi kingakna kham ting ah ei gel uh a pawimaw ma ma hi. Vaihawmna hi a dik zawlo phatleh masawmna a tawm sek ah kochuam a chia zang thei pua, zia zia kah chun, kivaihawmna dik leh lamzang i nei theina ding uh chun Kochuam Dan leh kikaihuaaina bute, zik leh ziklo Dan te thupukna masate haw hiatchian ten a ngai seh hi.

Kochuam kietkawlna leh kivaipuakna hi kikaihuaaina Dan apat a hi. I kochuam hin kikaihuaaina dan chi chuam chuam i nei ua, PCI constitution/ Danbu bakah Synod in byelaws tamtak a siam ah, etsakna'n; Nupan chungchang dan, sum vawp dan, services, Gamthak manual, Hospital, communication, Kochuam Numei Pawl leh Khanglai Pawl kikaihuaaina leh a dang tam tak a um nalai hi. Zia tilo a hin Tradition leh Practice (Ziklo dan) te hi hiatchian a pawimaw khawp mai hi.

I kochuam uh Presbyterian dan hi Pawl dangten le ei entawn

zing ui. Zia gual takah Dan pha leh hawi i nei zinglai un, ei uh hin i danteu i hechian un i manghawi nau em? Kikaihuaaina leh Dan te hi i zil ngun uh chun a phatdan te hethiam to zel ding i hui. Dan i hiatlo sek zia kun thil neucha cha ahin i buai ma ma sek uh a hi kha. Zia zia kah chun i danteu hi ngai pawimaw thakin hiatchian guan pan lathak hitiu.

V. Khumkhakna:

I thupiu hi nepnel takin i gen man pua, ahinlah, tamlo i vak taklat te hi a pawimaw ma ma hi. Kochuam ah Pathian nasepna hi na pawimaw pen pen, sep sen ding hilo maleh, i phak taw k chiatun taima takin sem zel hitiu. Kochuam in mawpuakna ei piakte hi gunchu takah sep daw hi i mawpuaknau a hi. Pastor leh Upate'n i hinaw leh i dinmun pawimaw ziateu hezing pumin kochuam nasepna hi ngai pawimaw thak chiat hitiu.

Lalpan simtute zosia malsawm chiat taken.

KHANGLAITE LEH TAIMATNA

*Pro Pastor T. Lalgin Vaiphei
D. Phailian Bial*

Khristian Khanglai Pawl tawh taimatna hi chiakhawm zing a ngai ah, taimatna hi khanglaite ah bek zing ding a hi. I Bible in “Thâtdana khut in châtgana a tun in, himaleh, mi taima khut in hausakna a tun sek hi” a tia (Tpl 10:4). I Bible mun tamtak inle taimat sua ding hi a ha gen ah, thada lo dingin a gen bawh hi. Adam khale Eden huan kaitua ding leh vêng dingin a kawî ah (Thl 2:15), Thugentu inle “La khut in a sep ding a mu taphawt chu, bang hilehle theitawp sua in sêm in...” ati (Tgt 9:10). Thuthung Thak lam inle taimat ding chungchang tamtak a kizik hi (Kol 3:23, Php 3:14, 2 Pe 1:10, 1 Th 5:12-14, 2 Th 3:7-8). I Pathian ngei ule khawvel a siam til lai ah kichawl lo ah taimatak ah a Siam ah, Jesu ngei inle “Ka Pa’n tutiang hin na a sêm zing in, ke’nle ka sêm a hi” a tia (Joh 5:17).

Taimatna hi bang a h’em? Taimatna hi hâttak ah, lunglut tak ah, uluk tak ah, ginum tak leh dawthei tak ah, i lungtup te a mualsua theina ding ah nasep a hi pen hi. Pathian in zia khawvel a siam ah, taimatak ah i damsung hin nâ i sep chun, khawitak munah le lawtinna leh kipakman kimu ding a hi.

Taimatna hi thil bailam ahi pua, mihiamte hin haksatna hun le i hau sek ua, fel zing ding hi thil haksa tak khat chu a hi. Tulai khawvel a kitheng mama ta, i lungthim lamang ding hile

tamtak a um ta - internet, social media, gaming, et nawp leh entertainment chuam chuam te ei subuai thei ding a tam ta khawp mai hi. Mihiamte hi thil nawp sak nalam ah i lut pai sek ua, gitlona hikhel lo maleh, i nasepna dâltu liantak a hi thei hi. I khangdawn lai ah i thahatnate’u, zia nawpsakna lam ah i mat zing u ahileh “châtgana” ei tun mai ding a hi. Nekhawlna bang gual kistem maleh, taima tak ah i sep chun lawtinna kinei intin, zia chun lungawina hung tun in ah.

Mi taima i hitheina dingun a nuai ah te hi ngaitua hitiu:

1. *Pathian kawi masat:* Gingtu i hi nau ah i hinkhuau vaihawmtu hi Pathian ahia, Pathian hi bangkim ah a masapen a hi zing ngai hi. Pauchapna, A thuhing sim, Ama tawh kipawlna - zia hin i lungthim zângkhai sak intin, i thagau hinkhua le suhal thak zing inah. Sâpte`n “What would Jesus do?” “Jesu`n bang a bawl diam?” ati sek ua. Zia tak ahin amau hin thil a bawl masang ua Jesu`n bang a bawl diam? ti a kidawng sek ua. Jesu`n a bawl dingah kilawm lo ahileh a bawl lo mai sek ui. En le zia ngaituana hi kimang ta leh, taimatna hi ei ah bek ziang ding a hi. Jesu hi a thabei pua, a nungzuite le thâtbeilo ding a hi.

2. *Zingkal thaw vak:* Zia hi khanglaite a tam zawn haksa i sak pen uh a hi. Zân ah i hak sawt sek ua, zingkal lam ah sawt pi pi i ipmu kit sek ui. Zingkal thaw vak hi hiselna ahia, nâ le tampi a kistem dawk man sek a, i lunggel le a chia hawi laitak a hi sek hi. Pauchapna`n i ni teu pan

hitin un, sep ding hawl leu hin kitaima ziang ding a hi.

3. *Thil Guanggal Fel:* I hinkhuau ah thil zosia i guanggal fel lo a hi chun a kibuai pai sek a, nisin ah i kimat dan ule a subuai thei hi. Thaw hun, ipmut hun, annek hun, chawl hun, lekha sim hun, kihel hun, devotion nei hun leh thil dang dangte hi hawitak ah guanggal ahileh ei a dingah le thil bawl hi nawp zaw`n ah. Nasepna chuam chuam hichu a hun tep umtheilo le um tho inah, chuleh i buai thut chang le umsek maithei, ahinla routine/planning i nei lawksa ahi chun bangzat hem khat ei kithuapi thei hi.

4. *Hun mat thiam:* Zia hi a chungah hitawh a kizawp thim ah. Mi taima chu hun mat le a thiam ah, a hun te`u hi a mawk sukmanng ngai puau hi. Hun mat dan i thiam chun nâ le tamtak a kistemdawk ah, nâ le a vaikhawnung a dingah a kichawn ngai pua, mi hun le a kisumang pua, midang te dingah nawksak le kihilo ding a hi. A hun nunung (last minute) ah thil i bawl him him chun, i thilbawlte a hawi thei

pua, bawl thei hunah i bawl daw hi ei a dingah a pha pen a hi. Sâpte'n 'time is money' ati gual un, hun hi a mantam ah, thil pawimawlo ah i sukmang dingu hi i hun uh a ît um hi. Gingtute hi Lalpa'n ga sua dingin ei tia, i damsung chawmcha ahin ga sua ngei dingah i hunte'u i mat thiam uh a ngai hi.

5. **Phunchiak lo ding:** Khawvel ahin phunna ding kihawl leh tamtak kinei ngei ding ahia, zia gual ma chun kipakna ding kihawl lele tamtak kimu tho inah. I nasepna'u ah kiphun phun ziang leh i ngaituanau a subuai thei ah, i lungput ule a susia thei ah, i nasep le machâl theilo

ding a hi. Bang gual ah kigim maleh le phun lo ah dawtheitak ah nâ i sep chun lawtinna chu kimu ngei ding a hi. Dawtheina hi Thagau Ga ahia (Gal. 5:22), gingtute nei dingah kilawm tak a hi.

A chung ah kigente khêl lam ah thil pawimaw dang le um inah, ahinla zia te hi i zui phawt a hi chun masawmna i nei ngei dinguh gingchak a um hi. Thugentu in "La khut in sep ding a mu taphawt chu, bang hilehle theitawp sua in sêm in..." (Tgt 9:10) ati gual khan en le pan lathak kit hitin, theitawp sua in Pathian nâ sem hiti un, taima tak in hinkhua mang hitiu.

Uphawk hawn khat hi gamlak ah a vak lai un pani te chu kawkhuk sung khat in a ketha tau a, a dang te chun kawkhuk chu umkual in a thuk dan a mu un beidawng in a lawite ni uh chu suakcha ding ah kinepna um talo in a ngai tau.

A kelut teni chun a lawite thugen limsak lo in suakchat di gua in a kichawm ham ham ua, a lawiteu chun, 'pawtdawk zo puanlau, hunsak un, thi ding in kipiadaw un' a tiu a, khat zawk chun a lawite thugen chu dik sa in a thi ding in a um den tai.

Pakhat zawk chu a kichawm hat deu deu a a chawm daw a, a lawite chun ka thugen uh la hepua hem la hung chawm daw ziang ah a tiu a.

Uphawk chun ka beng a ngawng ah la thugen uh ka he thei pua, chawmdawk dingah ei tilhangsan hinlau ka tia a hi a ti'i.

HINNA VÂK

KIPAN INLA MAICHÂM SIAM IN

(Genesis 35:1-3.)

*Rev.P.K.Lianmang
Guwahati, Assam.*

Genesis 35:1-3.

Pathian in Jakob kiang in, “Kipan inla, Beth-el ah chiato in la, zia tak ah chun chêng in; la u Esau kiang ah kipat la taimang laia la kiang ah kilâk Pathian â ding ah khan maicham siam in,” ti’n a hila. Tichun, Jakob in a chanaute leh a kiang ah um zosiate kiang in, “La lak ua gam dang pathian um zosia paimang unla, kisuthiangtho unla, la puanteu le sang un; kipan hitiu in, Bethel ah chiato hitiu; tichun, ka lungzin lai ah ei dawnhu ah, ka chiana lam zosia ei kitawnpi zing, Pathian â dinga maicham ka bawl theina ding in,” ti’n a gêna.

Jakob in a nu Rebekah tawh a u Esau a thêu ua, a pa malsawmna a kilâka, a pu Laban suak in, a pu Chanute leh a ganchate law ding in Paddan-aram gam in kum sawmni sung a pang a hi. Zia kum sawmni sung ah chun Laban in sawmvei hial a thêu hi (Gen.31:41). A pu tawh a buai khawp dikdek nung un lungna takmai leh thangtawm takmai in ama tha gua a u Esau kiang lam zuan in a gûk in a hung zammang ta a hi. Vân Pathian malsawmna vang tam tak a dawng man hi. A zi

Leah khan chapa 6 (paguk) leh chanu 1(khat) a hin piaka; Rachel suaknu Bilhah khan chapa 2 (pani) a hin piaka, Leah suaknu Zilpah khan le chapa 2 (pani) a hin piaka, chuleh, Rachel in Joseph a hin piak a hi. A lêng un pawsal 11 (sawm leh khat) leh numei 1 (pakhat) a hui. Chun, sangawngsaute, kelchate, belamte, sabiltungte leh bawngte sang tamtak ah malsawm in a um hi. Chuleh, suak nasem numei leh pawsal tamtakte a nei hi.

Ahin, malsawmna tamtak dawnga a pa Isak chenna

Beer-lahai-roi khua, Kanaan gam lam zuan ah a chia zing lai un Shekhem gam a tung tau hi. Zia gam ah chengte chu Hiv mite a hiu ah, a lêngpau Hamor chapa Shekhem chun Jakob chanu neisun Dinah chu hawi sa mama in a ngaizawng ta, a la pawngsual in a thanhuaipi ta a hi. Tichun, Jakob kiang in Dinah chu a zi ding in a va dawn tau a hi. Maleh, a suapi pawsalte chu a suapinu`u kipawngsual ziaka thangtawm mamate chun Shekhem mite chu thê in a zek uh tan ding in a la hil ui. Zia guala chu zek tana nâ-sa leh khawsik gim takah pawsal zosia a um laitak un Simeon leh Levi chun chemsau chawi in Shekhemte pachan leh khaw sung ah pawsal zosia chu a va thatgam sik sek tau a hi. Tichun, a suapinu`u Dinah le Shekhem In ah pat in a pui dawk tau a, a nei leh lam uh sum leh pai, ganchate haw tiang le hun chawm gam in, numei naupang zosiate chu le galhing in a hung man sik sek ui.

Zia thua ziakachun Jakob chu lungngai takmai

in a um ta. A chate kiang in, “Nang un zia gam ah chêng, Kanaan mite tawh, Periz mite huat ah ei umsak in, lei hi lunggim mamau hi. Ka mite hi tawmcha bep a hi ngâl un; kei leh ka Inkuante sukmanghai a um mai di ka hiu,” ti`n a gen tai. Zia gualah Jakob lungngai leh thavai taka, panpitu di leh melmate dopitu di neilo ah kihia thawmhau mama leh lunggim mama a um lai in Pathian in a hun ho ta, kipan dawka Beth-el lam ah chia to a, maicham siam a Pathian ho ding in a hun sawl ta a hi.

Damlai khawvel ah hun mang ah, a suk a to ah lungngai thavai ah i zin zing lai ua hin, a sia i bawl khak changteu um in, a pha bawl kha malsawmna tamtak i dawn hunteu le um in; lungngaih ni leh i lim ma ma nite a um matchet a hi. Ahinlah, mimal tin leh Insung tin hin lungngaina leh lungzinna di i nei chiat ua, mi hiatlo kâl ah bang bang ziak a hem ah, kikhadawp hial ah mitthi luang ah um hun i nei zel sek uh a hi. Zia khawvel thim ah i len lai ua hin chu a suk a to hi vang

HINNA VÂK

bei tikni um him him pua'na e. Ahinlah, Jakob lungngai-lunggam mama Pathian in a phawt hal gual ah hin eimau leh eimau kiphawnggal zel sek hitiu. "Kipan inla, Beth-El (Pathian In) ah chia to inla, zia chun maicham siam in," tia sawl i hiu. Milim ho thiampu maiba a h'em, maibi a h'em, khutlam enthiam a h'em aisan thiam kiang a h'em zuan lo in, Pathian hing kiang ngei ah chia dingah ko i hiu.

Jakob in a zi leh chate zosia chu kisuthiangtho ding in a hil ta, pathian dang milim a la kawl teu haw leh a bil ua a bateu haw chu Jakob kiang in a hun pe khawm tau a, Jakob in ziate haw chu Shekhem khaw kiang ah gangpi thing nuai ah chun a hâl tum sik sek ta, Beth-El ah chun maichâm thiangtho chu a siamta a hi. Tichun, Kanaan gam zuan ah a chia lai ua, lampi dung ah mipi umte haw zosia ah chun Pathian mi Jakob Inkuante launa chu a um nasa mama ta, kuama'n amau chu a del zui ngam tapuau a,

do le a va do ngam talo uh a hi (Gen.35:4,5). Thadam tak in Beer-lahai-roi mun, Kanaan gam Isak chenna mun chu a tung tau hi.

I zinnau thalek gam ah hin mi hiatlo kâl ah mitthi luanni, "Lalpa, la zawlneite zosia a thatgam tau a, kei bep bep hi a suakcha ka hi,"Zawlnei Elijah guala ti ziang thei nite um sek maleh, "Baal ma-ang ah khiangkho nailo mi sang sagi nei nalai ka hi," a ti khum mai a hi kha Pathian in. I lunngai beidawn teu hi Lalpa'n a phal mama sek a, a hun tak ah ei panpi ding in a kisazo zing kit hi, ti hi hemil puai tiu aw. Pathian kiang zuan zel hitiu in, nutsia ngai leh paithâk ngai tampite paitha'n hâltum zel in, Ama ei hepitu kiang zuan zel leu hin, ei thatham ngailo, ei hepi zing zing i Pathian un ei pui zing in tin, lamzang tak leh sukbuai lo in lim leh kipak takmai in Van Kanaan gam nuam chu ei puitung pai ziang di a hi. Lalpa'n a thu hung malsawm ta hen.

March 2022

PUMKHAT HI DIN JESUN EI DAWT PIAK HI

(Johan 17:21.)

*Upa A.L Thanga
Imphal*

Bible chang Johan 17:21. Amau hawle pumkhat ah a um theina ding un, nang ka pa keima ah la um ah keima le nangma ah ka um gual in, amau le eimau ah a um ua, khawvel in keima hi nang ei sawl ka hi ti a ginchak theina ding un.

Khristiante hin kipumkhat ding hi pha i sau ah daw i le i daw i ma mau a hi, Kochuam khenkhat te vang chun kikhawmpi thupi inle i la mang sek ui, ahinla thil da um tak mai chu zia thil hi a tak in a tung thei lo hial ziang a hi! Paul E Bill Heimer chun khrista taksa(kochuam) a kikhen zakna um sek hi khristiante minsiatna a hi zing sek in, kochuam in thil a hikhial lian pen tak chu, zuau gente gukchakte, zukhamnate, angkawmnate hi a hipuan, kipumkhat theilona gitlona hi a hi tin a la gen hial a hi.

I chennau Manipur gam sung a hin le kochuam pawl chuam chuam 20(sawmni) val lam i um ua, kochuam mal/cheng te hinle thilphalo dona chu i nei chilchel chiat nau in, himaleh a kilawmkhawm a khristian hina zia ah thil hikhawm vang chu i nei kha bek lo uh hin a kilang hi, bang hem tichang vang leh chu sepkhawm sang inle a kipet tua gual ah i um hun uh le um sek hileh a kilawm zaw hial sek a hi, kochuam khenkhatte vang

chu eima seppite ngei tawh le kituak theilo in belcha/bel neu cha cha a chuam chan a kisan chil chel hileu a kilawm ziang hi.

I gam sung ua khristiante umdan hi chu i Lalpa'u Jesu pauchapna amau hawle pumkhat ah a um theina ding un (johan 17:21) ti thu hi tawh vang chu a kituak nai chet lo chu a hi hi, a bang cheng chu hi ziang ta ma leh zia taka i Lal Jesu'n a dawt pen hi chu a hun takah khrista'n a suk lawtin

dingah Pathian thil guat lawk chu la a hi ngal in (Ephesa 1:10) zia lam tawh kisai ahin khristian pawl chuam chuamte hin bang gual in panlak thak ding ahi diam? Bang gual leh bang lampang a kipumkhat na ding guanggal ding a hi diam ti thute haw hi chaldawm hial a ngaitua hun vang chu a hi tak zet tai.

Bang zia leh bang ding mawng mawng ah i Lalpa'u Jesu hin khristiante kipumkhatna ding hi pa kiang ah a la dawt a hi diam? Dawnhuna ding lam chuam chuam tam tak um theite lak in lam chuam chuam in thil Pathum bep cha vak gen hi tiu.

1. Pathian kumtuang thil tup a hi: chapa khat hina a chun pa in a thiltup leh daw gual sukpitin na dingah dawt chu thil hi ding mawng a hi. Ephesa 1:9,10 a chun sawlchak Paul in Pathian thil tup zia gual hin a la gen hi.

Khrista ah a thiltup a doilam dungzui ah a lunggil thuguk chu ei hiatsak ta a hi, zia a dawilam lunggil chu hunbi a hung tun phat leh thil zosia van

ah umte leh lei chung ah umte chu, khrista ah gawm khawm in suktua sik sek ding ti hi a hi, ti'n a la gen a hi. Gingtu piting leh kochuam piting hitate chun vang mi gensiat na ding hun a nei ta puau in, zia Pathian thil tup hi sukpitin na ding a hin theitawp sua in a sem sek zaw tau a hi, zia gual chu a hi zia in ei Manipur sung a um pau kihetua te hinle Pathian thiltup sukpitinna ding ahin panla thei ma ma nailo i hui em leh? Pan vak la ta leu hin chu lawting ma ma ding i hui.

2. Khawvel in ama Jesu khrista a hiatna ding un: Kochuam nasep thupi pen chu chanchinpha puanzak a hi (Mat 28:19. Mk 16:13 Joh 20:21). Khristiante hi i lengua i kipumkhat phawt a hi chun khawvel in Lalpa Jesu khrista hi a hina tak chu hun he ziang ding a hui, Jesu ngei in a pauchapna khan ziagual hin a la dawn a hi kha. (Johan 17:21) amau hawle pumkhat ah a um theina ding un khawvel in keima hi nang ei sawl ka hi ti a ginchak theina ding un, chuleh Nasepte 2:44-

47 a chun, khristian masate'n chanchinpha a gen danuh i mu'u a hi.

Gingtute kihepitua ah pumkhat ah a um khawm nau a hin mite lungthim a thu a genthei a hi ti hi zia Bible chang a pat hin i he thei a hi, Lalpa Jesu ngei inle la kihepi'u chun mi zosian ka nungzuite la hiu ti hun hethei ta'n nau (Johan 13:35).

3. I kihepitua chiat theina ding un: Kihepi tuana hi kipumkhatna siamtu chu a hi ngei mai hi. Himaleh zia takah i thiltup pen chu kipumkhat phawt mai leu hin zia kipat chun hung kimelhiat tuana in zia kihiat tuana a pat chun kihepi tuana hung piang in tin, zia kipat chun hepina chun a daw thei ah, a engsia puan, kilawm lo takin a um nuam puan, ama angsung ding bep cha a buaiپی puan, a lungna vak nuam ngai puan, mi sukkhial na le a hezing nuam ngai diak puan, zia thilte haw a kipat hin kipumkhatna chu a hun hing dawk in lalpa Jesu pauchapna chu a hun subuting thei ta ding uh a hi.

Thukhakna: aw le i thupi'u huap lian tak mai hi vak chun neu deu in i khawmpi Manipur Area chungchang thu chawmcha vak gen belap leu hin, i Lalpa Jesu khrista pauchapna subuting ding in pan nasatakin i mi masateu in pan a la lakna zal un bang hem tiang subutingt thei ta ah i um ziak un Lalpa bep in lopina chang ta hen!

Tuhin le maban sau tak mai i nei nalai uh a hi ti hi hemil lo in, pan nasa zaw diak in la to zel hi tiu, kipumkhatna ding dawina ziakah i puitu teu thawknate haw leh Lal Jesu thawkna te haw hezing kawm in haksat lai leh genthei lai in le hepina ah ei sawlpa za um na he zing in, i mabak a sep ding umte hi sep zaw manlo khak ding lau in kihawmthaw leh kisuangla tak kawm in i Lalpa Jesu'n suak pha leh ginum ei ti theina ding in kipumkhatna daw leh tup ah nei in masawn jel hi tiu. A bul ei patpi i Pathian hin ei pui zel ding a hi ti hi gingla lo hial in kipumkhat na ding in panla zel hi tiu. Lalpan a thu malsawm ta hen.

HINNA VÂK

PATHIAN THUZAWM

(Johan 14: 15, 24).

*Upa Khamkholal
Munpi*

Bible changtel: Johan 14: 15, 24.

“Nang un lei hepiu leh ka thupiakte jawm in lau”, ti leh, “Kuale, keima ei hepi lo chun, ka thugente le a zui nuam diak puau hi; ka thugen la hiat teu hi kei a ahi puai, Pa ei sawlpa a ahi zawi”. ti te hi.

Tuchung Hinna Vak ah article zik ding ah Publication Board in dawisakna ei piak ziak un kipak a um takzet hi. Kei pentak lekha zikthei chi in le ka kingaitua pua, himaleh, khawtin agent te lak ah pat khatvei hun lemchang ei kipia hi din ka ngaitua a, kipak tak in ka hun zik hi. Mi hetlo kihil di thu le um ta ding in ka gingcha pua, pawl leh mimal sawisel gua’ zik le ka tup puai, ti ka gen masa nuam hi. Pathian thu keima’n ka mu leh ka ngaitua dan a pat neukhat zik ka nuam hi.

I Bible chang sim teu a pat thil kichian ziang chu, Pathian thu jawm te chun Ama le a hepi tei uh hi a hi. Chuleh, a langkhat lam le zia lelam ma

chu a hi, pani na i mu gual un. Ziakchun, thupetu hepina leh thuzawp na chu a kizui tin ten a hi. 1Johan 5:3 ahin, “Pathian hepina chu zia hi a hi, a thupiakte i zawp uh hi” ati a hi. Thupiak ah Pathian hepi di dan ei hil na chu Deut 6: 5, “Lalpa la Pathian chu la lungthim zosia, la ngaituana zosia leh la hatna zosia’n la hepi ding uh a hi”. ti hi. Zosia, Zosia’n ti haw ahia, mihing hatna bawlzaw ziang theilo te ahiu hi. Pathian thagau kithuapina i mamaw’u hi. Pathian thu ngainepna chikhat dang chu, ei a ding ah kilak utlo na hi ahi. A hun lai tawh kituak ah thu kizik, mimal leh Kochuam pawl te kiang ah kigen te hi tu hun ah i kiang ua kigen gual ah i laklo sek uh hi a hi. I kingaitua sang

un mihing te hi i zulzau tho ui. Ei mau ut dan dan in thilpha lam in le i kithunun zo ziang lo a hi. Mamaw dang zosia te le Pathian kiang ah i dawt gual in, zia haw lam thil te haw hin panpina i dawt a pawimaw tho a hi. 2 Khangthu 25:2 en leu hin, “A lungthim zosia’n zuilo maleh, Lalpa mitmu in lam dik a zui hi” ti i mu’i. Juda lengpa Amaziah chanchin, a bul kipatna a hi. Chang 15 na hin a siatgawp na di thuhilna a um a, a hun a tawpzui ngal a hi. Lungthim kimkhat Pathian piak in umzia a neilo dan a kichian a hi. Lalpa’n malsawm ta hen.

Nektheisiam pakhat kiang ah bawngnawiking zuak sek huanbawلمي pakhat a um a. Nikhat chu nekthei siam pa chun a bawngnawiking chawk sek chu a gikdan a dik leh diklo hechian nuam in a te ah, a dik paw ngei ta. Lungna tak in huanbawلمي pa chu thutanna in ah a pui tai.

Thutantu chun huanbawلمي pa kiang ah chun banggual tena a mat a h’em ti a dawng a. Huanbawلمي pa chun ‘Pu, kei hi mimawl ka hi hen, tena kituptak neilo ma leng pakhat chu ka nei hi.’ a tia.

Aleh bangti’n bawngnawiking chu la te sek a hi em ti’n thutantu pa chun a dawng ta.

Huanbawلمي pa chun;

‘Hepu, nekthei siampa hin ka kiangah bawngnawiking a hung chawk sek masang lam pek a khan, ama kiang in vaithum sel khat kala chaw sek ah, zia a vaithum hun chawi sek gik dan a chun kenle bawngnawiking chu kala te sek a hi. A maw ding a um chun nekthei siampa hi hiding a hi.’ ti’n a dawnhu tai.

(Matt. 7:2) La tena ngai ma ah hun te piak kit in au.

PAUCHAP

(*Sam 32:6; Philippi 4:6; Sam 65:2*)

*Kh. Thianniang
Treasurer, CKNP*

Aw Pauchapna ngaithapa, lakiang ah mizosia hung tau hen. Gingtu hinkhua a hin “PAUCHAP” ti hi a pawimaw ma ma hi. Gingtu khat ka hi kiti taphawt chun nisin in Bible sim leh Pauchapna Pathian tawh kipawlna hun a mang ngei ngei sek ding a hi. Bible sim hin Pathian ei kihopina aw hiatna ahia, Pauchap hin ei ma’n Pathian i hopina a hi.

Philippi 4:6 ah chun, Bangma lo mai mai in lungkham kiu inla, Bangkim ah Pauchap leh dawn in, kipak thu gen kawm in, la dawtna teu chu Pathian kiang in hiatsak zaw tau in, ti i mu a hi. Bangkim ah Pauchap ding chu a haksa na ding e i ti maithei ua, nisin ah sungkuan kikhawpna i mat teu haw huntawk le i sa maithei ua, i Bible in bangkim in pauchap un eiti a hi. Kipak hun inle, damlona khawk tak i tuak hun inle, tasam leh beidawng ngawi ngawi ah i um hun inle Pauchap ah Pathian tawh i kipawl zing ding a hi. Danial ngei le nikhat in thum (3) vei a pauchap ah Pathian in tummeipi sa lutlut

leh sakeibaknei lak ah pat in a hukdawk a hi kha. Mizosia i pauchap dan a kibang pua, khenkhat chu Pathian phatna bep ngaitua ah kipak thu gengen thei, khenkhat ahileh a chung ah Pathian phatna mawng mawng gendi helo hileh kilawm, khenkhat chu ama daw i bep dawn ah Pauchap sek, khenkhat chu a hinkhua ah haksatna mawng mawng a tuaklona dingah a nung a mâ a vei leh chang ah veng zing ziang ding ah pauchap zing sek. Pathian thu i sim na ah chun bangma lo mai mai ah lungkham lo di leh bangkim ah kipak thu gen ding in ei ti a hi.

1. KIPAK THU GENNA :

Leng David pauchapna hi a thupi mama ah zia gual hin Lalpa ma'n a pauchap hi. "Aw Lalpa Pathian keima hi kua ka hia ka inkuan te le kua ka hiu ah zia tiang tiang hi lei pui a hi em? Aw Pathian zia hile nang a dingah thil neucha a hi nalai hi. Aw Lalpa ka Pathian nanging milian tak gual in lei ngai nalai set a!"

1 Khangthu 17:16, 17 Leng David in Pathian phatna a muchian ziakin Pathian ma ah bangma a hilo dan kihe in kingainiam tak in a hungah Pathian phatna te ziak in kipakthu gen in a pauchap a hi. Eimau inle Leng David gual in zia tiang tiang lei pui, i phatna leh hawina neucha le umlo, natna hipi khawvel pumpi'n i maitua ua, mi tamktak in a hinna'u mansua in mual ei liamsan lai un amau haw sang ah le fel zaw leh phazaw kihi diak samlo, himaleh Pathian zangaina ziak liau liau in hing leh dam in i um ua, Pathian kiang in kipak thu i gen gen mai ding uh a hi.

Habakuk 3:17, 18 ah hitihin

i mu, Theichang selthak lo in, Oliv thingte'n ga sua lo in, lo lai ah bu piang lo in, gan gualte chule a huang ah um ta lo in, gan kulah chun bawnghawn pakhat chale um talo ziang maleh, Lalpa ah chun kipak zing ing ka tin, ka hukdamna Pathian ah chun kipak zing ing ka.

Habakuk hin a guk in mu a nei hi. Bang ziak ah mifel in a thawk sek a hi em? Habakuk thil tuak te haw hi ama ngei inle a hethiam pua hiatthiam hak asa a tawp ah chun mu dan a hun neita, ziak ah chun a nei leh lamte chan ziang maleh Lalpa Pathian a chun kipak zing ing ka tin, ka hukdamna Pathian a chun kipak zing ingka a hun tithei a hi. Natna/damlona a h'em, taksapna a h'em i tuak lai inle gingu te haw hi Lalpa Pathian ah i kipak zing zaw ding uh a hi.

2. GITLO THUPHA CHAWI:

Rom 3:23, "Mi zosia'n thil ahikhial zaw tak ziak un Pathian lopina a chang zo talo a hi." Khawvel ahin kuama mipha umlo a hi, Pathian ah

HINNA VÂK

gitlo thupha i chawi chiat uh ngai a hi ti Pathian thu in ei hil a hi. Joel 2:13 ah chun, la puan uh hilo la lungthim teu bawtkek un, a ti nalai hi. Lalpa la Pathian lam un hung kit un, ama chu mi lungsiat thiam leh zangai thiam, lungniang leh lainat na dim leh mi gawt ziang nuam lo a hi ngal a. Natna hipi leng zia in kochuam ah semtu pantute, thupi hawngtute, thugentute, Sunday school zilsaktute leh committee bak chuam chuam ah guat ah umte haw le nasa tak in i kithada zo tau ah, Lalpa Jesu'n Kross ah a hung thawkna kha ngaitua thak in i lungthim teu bawtkek in Pathian ma ah kitulut in gitlo thuphachawi in Pauchap leu hin ama chu ei ngaidam ding ah kisa zosa a hi.

3. PAUCHAP DAN:

Paukam thiam leh thiamlo chu thuchuam hitaleh, titakzet leh phatchuam ngai tak ah Pauchap hichu hiatkhen thei lo gual a hi puai. Mite ngai ah kilawm ding ah thusam kual thiamna lam sang in ei dawnhu theitu kipak nalam a pawimaw zawi. Amachu thagau leh titakzet ah ei phuttu a hi ngal a (Johan 4:24). Pathian a ding ah le dawnhu leh lawtin nawp ding ah i pauchap uh ut a um hi, Pathiam lungthim sukha ngei ding ah titak zet leh phatchuam ngai tak ah "Sakhichal luicha tuiluang ducha, a hat dup dup gual in, Aw Pathian ka hinna hi nang ma ngai in a ha dup dup hi" (Sam 42:1) ti in Pathian thangai tak in i pauchap sek uh dawi a um hi.

*Pauchapna in Pathian a theng danglam
pua'n, ama a pauchap tu kha then danglam
in a um zaw sek hi*

~Kierkegaard

“I CHENNAU IN DING CHU VANGAM A HI”

*T/Upa L.M. Vaiphei
S. Munnuam*

Vangam : Hebrai pau ah “ Samayim” i tiu hi vangam gen na ahia, pakhat sang a tamzaw gen na ahi. Judate chun, van chu sawngthum sang ah tamzaw lo in a ngai ua, a chungnung pen chu “Van te Van” ti a sak ua, Zia taka chun Pathian chengin a gen sek u’i. (Duet. 10:14, I lalte 8:27) Zia ngaidan kibatpi chun sawlchak paul in le van thum na ah lakto thu a gen ah (2 Kor 12:2-8) Judate hin Pathian hi a za mama ziang ua, a lau bek ua. Zia ziak chun Lalpa Jesu’n le vangam chanchin gen tam mama lehle sawng thum gual in ala gen ngai puai, kikul chuam gual in le ala gen diak puai. Vangam chu Pathian chenna ahia, zia tak a chun Lalpa Jesu’n ama gingtute ding in mun a siam a hi ti i hiau a. (Johna 4:2) vangam chu khut a saklo kumtuang in ahia, gingtute din gochan setheilo leh chuai theilo buak beklo chu guatpiak ahiau a. (1 Peter 1:4) van ah chun gingtute go mantam a um ah, i kipak man dinguh le a um ziak in nasa tak a kipak ding i hiu. (Mat 5:12; 6:20) van a chun i min uh le zik a hita; van khua leh tui i hi tau hi. (Phil 3:20)

Vangam nawp di dan hi gen chian thei di gual eipuai. Mitthum te kiang in pakcha hawidan te, nivak hawidan te hi genthiam gua leu hin le a mu thei diaklo uh chun a suangtua thei diak puau hi. Ziagual a chun lal David a pauchap na’n “nang ma gual a kamu phat

tak chuleh kalung awi takzet tan a” tin ala gen hi. Sawlchak Paul inle limlang kichianlo tak mu gilgial gual in ala tekhin a (I Kor 13:12) Zawlnei Isai inle; “lamite chun Lal chu a hawina ah chun ala mu’nau” tin a la gen hi. (ISai 33:17) lei kipakna bei kit mai ding

mun ah cheng te a ding a chun kumtuang kipak na mun ah um ding dante thatnawp um tak mai in suangtua ma leu hinle, a kimkhat ziang le i gen zo lo uh a hi. Ahi ziak inla, Bible apat i mu gual un van ah i mu dan dinguh thillawk thei tiang a um ah, Laphuak thupi tak te F.J. Crosby te, Shankey te, Evan Nana te H. Johnson te, F.A Blackhert te, S. Steaneth leh midang tam tak te hin vangam lim um didan suangtua na'n la thupitak tak ala phuak uh a hi. E.E. Hewitt chun "Tuni hin gam nuamtak chanchin chu ka ngai tuai, nitum phat leh ka um na ding chu" ti'n a la phuak ah, ziagual chun van ah i um dan ding uh thîl in lungngaite ei nem ah thiding kuante thamuanna ei pia, haksatna ei dawn zangkhai a hi. Ziagual a chun vangam ngaitua na gam ah vak zin hitiu.

Hepina Khawpi a hi : I vak lut phat phat un i hepi pen te mel vak mu tai tiu in, a kiang ah pat ah kichawn talo ah kumtuang ah umden ngal mai ding i hiu. Ziagual ma chun i chia vel nau ah i mu nunung taphawt te

chu a masate sang ah ei hepi zaw a hiu em? ti ding zaw hita ding a hiu. Kipakna huichim hang hiu hiau tan tin, zia chun i lungthim ngui te zosia suhal zel tan tin hepina tuipi gual in a fawn zung zung ta ding a hi. I kidawisak tuanau paukam te chun i lungthim teu su kipak mama tan tin, i mu leh i hiat teu chun ei kipak sak mama tan tin. Zia te chun kipak na la thak hawi tak takte ei lepsak ta ding a hiu.

Gitlo zawna la hawitak te sa pum in van kawt fang kual tai tiu in, soal ziaakah i lungngai nau zosia te kha zia gam a hin ala pakvul ding uh a hi. Pakna la phuak tun le "zawna tumbak chawi ah aw salem thak fan kal kangak lai" tin ala phuak uh a hi. Soal leh natna him him in ei subuai tapuan tin.

Zawlnei Isai gen gual in zia khawpi ah chengte chun "Kadam puai" ti tapuan tin uh, a sung ah cheng te chu soal ngaidam in um ta'nau (Isai 33:24). Zia khawpi salvak dingin ni leh tha ngai tapuan tin, belamno melphat na chun zia khawpi chu salvak tan tin,

belamno Lalchutpha a lai ah um chu ei veng tu a hi tak ding zia in, lau ding him him um tapuan tin, hinna tuikam ah ei pui tan tin, lau lo in i leng ta ding uh a hi.

Van gam ah i et nawp dinguh chu hung kilang intin “etnawp maktak hi’na tatsate i mu phat leh” tila i sak sek uh tu hin le i en zing tau ah, zia i et nawp pen diu chu migilo te hukdampa Lal Jesu Krista hi ding a hi.

Ama chu van sawlchak tamtak ten hung chawihawi in tin uh, lâ’n hung lem intin uh : Belam no thasa hi thilhitheinate, hausatnate, pilnate, malsawmnate, mu tak a hi e...tia a sak git zung zung un lungthim ah kipak sak tuak ma ma ziang ah.

Zia bep chule ahipua, van leh lei chung leh tusuagiat chungah a thil siam zosiate’n, belamno lopi zia te pak in Lalchutpha leh belam no kiangah chun malzawlnate, chawihawinate, lopinate, vaihawmnate, kumtuang in um tahen tia la chang a sak hum hum gitteu chu ngai nawp um ngei in a. Zia belamno Lalchutpha chun

a khut changlam ah lekhabu hunla’n tin, ziaphat a chun van dak le hung khen vung vung intin, belamno ama leh ama kingaitawm intin, a kithuamna lopi chu hung lipthan tin, chawihawina no a dawp chu Lallukhuk ma-ang ah hun kawi than tin a lopi zia leh a mak zia pak in lei leh van ten “Amen” tin lam tan tin uh, tuisuagiat leh khwvel zosia te’n “HALELUIAH” tia a nawn zut zut laitak ua a mutu lungthim chu bang gual in a kipak tadium uh?

Chun van ah “ANGEL” te’n le la hun sanawn kik intin uh “Chungnungpen ah Pathian chu lopi tak in um ta hen, lei chungah a kipak mama mihiamte kiang in chamna thu leng ta henla” tia ama a thâkna lâ a sak teu kha he nawn kik a hitiu in.

Ziaphat chuleh lei lam ah film hung kilang intin chungnung pen ah Lal Jesu umna zosia ah lei chung a lemna chibai i kibuktua sau sau lai te muding i hiu. A munawp pen ding chu “Khraws” ah a thawkna kha hi ding a hi. Kumtuang apat a

HINNA VÂK

Pathian hepina angsung a pai ah, kalvari tengah a puakzak dan kha i vek et chun, thagau khawvel gihawi leh van pau ten le a thuk dan a puan senlo uh a hi. Tui siamtu tuidu ah a dang a chak dante, hinna siamtu suklup ah, thawkitna lopi ah thokit ding ah phum a hi dante, leilung a ma ang ah a zaw dante i vak mu chun ama i ngaisân nau a lian chuam ma ma a, Jesu a langsal ma ma hi.

Zia felna leh hepina kigen in, khawvel thiamlo a chawpa ziaakah chun “GAN” ankuang leh thing hansedawl leh van ah Lallukhuk a kizem dup dup mai dingdan te haw hi a lopi tuak taluai, a thawknat zia hi i mitthi’u a pul zut zut laite, gitlo sim ah a kiang i zawt lai teu leh a hepina ah ei pai laite haw kha hetmil ni him him um puana.

“HALLELUIAH” Lalpan a mu kik tai tia migilo pakhat kisik na ziaak a “VAN” a suklin dante i mu chun mihing hi bang ahia lahet zing sek a h’em? ti ding kha vak gel daw k kik hitiu. Aman “LINGLUKHUK” a khuk ziaakah ei un Lallukhuk

i khuk tak zia teu, a thina ziaakah i dam tak dan teu, zia hin etchian thei di gual a hipuai. I etzaw nung in le etnawp um deu deu ziang ding a hi. Ziaziak chun, suapite haw a diak in Lalpa Jesu Khrista hausatnate he tam zaw diak tai tiu. Lal Jesu hiatchian zawk diak hi i kipakna pen uh ahia, zia chanchin hiat zawk diak hi van ah le tawp diak puan tin, nisin tuma sang in hung hawi zaw ding a hui.

Chan ding Lallukhuk sang in a petu hawina kilang zaw diak intin, a khawpi lopina zosia sang in hepitu mel chu munawp um zaw diak in a. F.J.C.ROSBY inle “EDEN thak innuam ah chun eila dawn maleu le, ei hukdampa mu masak pen kanuam” ti’n lâ ala phuak ah, ziaziakchun mihing hi kua ahia hem le? Ti hi kumtuang ah i thupi dinguh chu a hi.

I damsung hun chawmcha a ding in inkuan tinte hi i buai thei mama ziang ua, Kumtuang ah i umna dinguh ngaitua nân lah i buai pei bek puau a, “Amak sek ngei” khangdawng

pakhat thi di kuan chun a nu leh pa kiang in, lei ngai nau in thi di dan lei hil lo uh hi a khawk ngei e a tii.

Tulai khawvel ahin natna mak tak tak a pung ma ma ziang a, thakhat a thi thutnate, Covid-19 pandemic te leh mipi lauthawngnate hin ei chum zing ah, khawvel thil in sakhuate a naw chep zing lai in inkuan tam takte haw a sakhua un tutang zo talo in a puksia zotau.

Bible chun khawvel thil bep ah kisubuaite “IPMU” ti’n a gen ah. I inkuan teu hi khawvel thil in a ipmu tui talua tau hilo maw? Dan phat leh i thina dak in ei hung git khum intin, kumtuang gam hung hi mai ding a hi ngal ah.

Zia ziak chun hal hi tiu in ngai ven hitiu. Pathian lungnatna thuak di hilo in Hukdamna mu zaw dingah ei guat a hingal a (I Thess5:9).

Khaile unaute haw vangam chanchin tampi i gen ah i holim tau a, zia “IN” lopi tak chu bang ti gual in vatung thei ding i hui em ti chu nang leh

kei mawpuakna a hi tai. Hilo maw? Bang hi a pha a diam kihual in, kumtuang “IN” lopitak ah et nawp mak tak tak et sak ding in Pathian Belamno Lal Jesu’n dingsa’n ei ngak tai.

Ziaziakchun “VANGAM” i chenna dinguh kawt huang sungah chun lut ding in nang leh la inkuante kim takin lut thei chiat ding in kisa chiat ta hitiu. Pathian Belamno vaihawmna a chun la umdante, lakin dante, la nun dante la chan thagau pawm tak a hi na diam? kingaitua in, det tak ah ding lahi nam? khut ah saklo “IN” lopitak chu tungthei ding in la kisazo tam? Kienchian in, dankhatto leh lam kal ah mangthai khai tiu.

Ama chu thutak leh thagau ah ho ding a hi. Zia vaihawmna ah chun pang thei chiat ah etnawp mak tak tak te en chiat ah ama lopina sulang ding in i hindan teu, leh i ngaituana teu, a pawm tak a hitheina ding in hin dang lam in ei hin sak chiat ta hen la. Malam kinepna lampi chu zuan chiat ta ding in a sim zosia te Lalpa’n ei malzawl taken. AMEN

LALPA HUIPI A HAT TA LUAI

(Mark 4:35-41)

Rev. S. Lama Vaiphei
Co-Ordinator

“Lalpa huipi a hat ta luai, tui kinawk a sang ngal a; khua nasa takin a hung nim tai, panpitu ding dang umlo. Ka kuang uh la tum di ei tai, nang lah la ipmu hen; ka manthai diu khawksalo maw Lalpa, Tho inla ei hukdam in. Hui leh tui kinawk ten a thu a awi, Chawl ta un. Huipi hangin gawpi zu maleh, vannim kawlphe leh hui bang machan le lawng suse thei puana lei leh van Lal lawng sung ah um kha a gin phawt uh chun. Za takin a thu a awi chiat ui chawl ta un.

Lalpa lawng gual mai ka hi, khawvel ah ka um sung hin; mangthai din ka kigingcha zing hi, panpi ding a hung masian. Thepnate hi thigua gualin, ka chungah a tung zing; detlo tak tui kinawk chungah chia gual, van tunlo ding ka lau hi. Thigawpi chawlsak gualin chawlsak un, chawl ta un. Kuang sunga la umzing gual khan keima ah la um zing hi ei panpi din, Ziaziaka chun mithephat Setan leh, bangkim la chawlsak gingchan ko le ung, ei do van nim te chawlsak in la” (KHB No. 129).

Zia la hi Mary A. Baker in kum 1800 tawp lam ah a la siam a hi. Mi tamtak in Lalpa lam ah khatlawna leh halthaknan ala mang tau hi. Kristian hinkhua ah haksatna i tuak teu hi zia tuanthu a hin a kichian ma ma hin ka hiai.

Tulai tak ah Myanmar gam ah i unau teu dinmun ding la hisap

kha sek uh em? Inmun lomun nusia phalbi dap leh khawsiat lai bangzat vei a paltheng tau em? Ni dang ah a mau vengbittu sepia te haw kha a mau sawisatute a hi tau hi. A insung mi leh a ngailai tamtak chên ta te haw khel lam ah ka buaiپی chu: insungkuan ah bit nalai hi ta leu le, a maban ding

uh beidawn a um ma ma hi. Malai ah Samari kulpi gual tho kha ahi tau. Anchang hung bei in tin, gas hung bei in tin, sum hung bei in tin, me hung bei in tin, khawsak a haksat ding dan chu! A mau panpitu ding a

hawl ua, tunitiang ahin a kinep gual ua pantitu ding a mu puau a, a tangval teu in sepaite a do ua, maleh galvan a kikhe bek ah, lungkhamna ngen in a dim uh a hi.

Khawvel tuisuagiat fawn lak ahin huipi zatchuam chuam anung sek a hi.

☞ Ei un Pathian zangaina dawng ah hunnuam tak imat zing lai ahin sungkuan tamtak a chun thinnan tha a zak zing ahi.

☞ Khenkhatin a tui tui nekding i buaipi lain sungkuan khenkhat a chun thi leh hin kikal in damlona leh accident ziakin kam ah meikhu suak hialin a beidawng ui.

☞ Khenkhat in in leh lo pha zaw sak ding buaipi ah sil leh chen mawizaw dawi ziak ah dawidan ki bangloah i kinial sau sau laiun khawpi kawtzing kal ah in leh lo neilo, sil leh chen ding neilo, nek leh dawn ding neilo ah gilkiak ngawi ngawi ah hun mang a dimin a um zing ui.

☞ Khenkhat in birthday lawm, pass lawm, malsawmna tamtak dawn zal ah kipak tak ah i um lai ua hin hinkhua bei dawng ah mani hinna suktawp mai ding ngaitua ah buai aum zing ui.

Huipi a hat takluat hun a um sek hi:

Lalpa Jesu ngei le pang in nungzuite chu kuang chungah khual a zin lai ua thiltuak uh ahi. Jesu panlo chung hile chu thil awm tak le hi maithei ahia, zia gual haksatna huaise tak a tuaklai uhi Jesu ngeile a lak ua aum lai ahi.

Tuifawn a sang ah, khua a thim ah, panpitu ding bei gualin a ki hiau a hi. I mimal chiat ua haksatna i tuak teu genkhawm ding ti leu hen gen ding hau talua a pau ding i kichu mai thei ui. Haksatna chiat chiat ale i taksa ahem i hinna ahem hi a hun sukkhak guat takleh i

HINNA VÂK

beidawna le a sang diak sek hi. I kuang (i taksau) i etleh tum vang vang ah a kilat hun a um sek hi. Jesu lam i ngat leh a la ipmu nalai. “Ka manthai diu hi khawksalo a dia aw” ti mai ding ah a kilawm hun a tam.

Huipi leh tuifawn te chung ah thunei Jesu

Khawvel ah i umsung ua hin zia lawng gual mai chu i hui. Peter chun a beidawn in Lalpa a ko hi. Lailong hausapu Pu Paulal Gangte laphuak chun, “ka beidawn in Lalpa ka ko a, aw ginna tawm tin ka khut tun ei kai...” ti in ala gen hi.

Kum thum vel a nung a zui nung ua khan le a thilhithei zia ala hechian nailo uh hin a lang hi. Hui leh tufawn te zosia chung ah thunei Jesu kha tuni anâ i sep uh Jesu hi a hi.

1997 kum akhan Lalpan la pakhat ei pia, ziachu “Damlaini tuanglam sau ahin samlo duthu ka chung a tung, thawkdan gelmaw in ka vai ngei, heisan ka lau chung Pathian lung in. Sim hui hung nung inla, aw mal hui nang le hung nungin, ka pak huan hi hung mut inla,

Lebanon wine gim nam ding in” ti ahi. A chang chang leh huipi hung nun ding ka lau sek, a chang chang leh ka ngakla sek, tuni tiang a hinle ka lungthim a kisial zing nalai hi.

Ei mau ah um Jesu kha

Kuangsung ah um Jesu kha a la ipmu ahi mai thei hi. Jesu nei hinna nuam iti zing lai ah bang ding ah eimau ah um Jesu kha imu mai a diam? Kuaman ei ngaisak lo leh kingai imut a bailam khawp mai hi.

1997 kum akhan EFCI kochuam ah ka va lawi sek a, Pathianni zingkal Sunday School ah ka imut suak sek dan chu kei leh kei le ka kidatmaw hial a hi. A kumkit 1998 a khan kochuam ka hung ding tau a, ka imut suak kha a bei kei mai hi.

A ziak pen ah ka hiat chu Lalpan kochuam etkawl di ei piak a khan ka lungthim ka pe ta, imut suakna hun a um ta puai. Mi biakin ah ka kikhawp lai a khan chu ka lungthim a la chawldam talua ahi ti ka hedawk hi.

Eimau ah um Jesu hile phawt thaw ngai hi ding helo ah ipmu a hi kha diam kienchian thak kit tiam hi tiu. I holimpi khât ta, ama dawnglo inle i khawsa thei deu taua, ngaisak a law zo talo khat a hi ta diam?

Lawng sung ah um Jesu kha hui leh thigawpi siamtu kha a la hii. Banggual in hui leh tuifawn kinawk ziang leh le lawng suse thei puan ah Lei leh Van Lal Lawng sung ah um kha i gin phawt nak ua chun.

Thutawpna:

Eima mimal bep hilo a chang leh kristian inkuan hi huipin a

hung nam ah ling dul dul ah, lau leh kithing in ei kawî sek ahi. Huipei laulo laklaw te chun ka imut anuam bep hi atiu le ahi mai thei, a lau te a dingin vang um zia zang le umlo ahi. A laulo hi chu panpi ngailo ahi mai ah, tuni i buaipei ding ua i dawî chu lau ma ma ngal ah panpitu ko nachang helo te hi ahi. Lalpa i lawng sung ua chung kha i phawn hal ua ahileh nang leh kei bep hi loin i kochuam lawng sung a chuang zosian le a bit pha ding uh ahi.

Nidanglai ah leng pakhat hin lampi lailung tak in suangtum a kawî ah. Tichun ama chum un kawm khat in a kisel ah, kua hin a hung ladawk diam ti thil zing kawm in. A leng in ah nasemtu za um tak tak leh hausâ tak tak te chun a hung pel sek ua, tamtak te chun Lengpa'n zia suangtum chu a suakte a lakdaw saklo zia kin a gensiau ah.

Lo nasem mi pakhat chu anche lohing leh me chuam chuam tamtak pu kawm ah hung chun a hun tuakkha ta. A van puak chu ngatha'n zia suangtum chu haksa takin a likdawka ham ham tai. A likdawna mun a chun sumbawm a mu, zia sumbawm sung ah chu sana dangka leh lekha pek ah Lengpa thuzik, 'sumbawm hi zia suangtum likdawka pen pen a ding ah ka kawî a hi' ti chu a mu tai.

LAILONG (L) KOCHUAM CHANCHIN

Lailong (L) khua hi 1882 kum in Pu Suongvang in ala sat hi. Pi leh pute chu, simgam Anpak Khuo (Myanmar) a kipat in Lushai Hills (Mizoram) a um, Zawlngak khua a hung cheng lut u'i. Zia kipat chun, khua hi sat a hi masang chu Manipur gam Sakelon khua a la cheng u'i.

Kum 1913 a Leisen khua Presbytery Khawmpa a chun, Lailong khua um Tv. Vangkap tawh Saichang a um Tv. Nekpawng leh Tv. Ngamngul a va pang ua, Pu Vangkap chun zia Khawmpa a Chanchinpha Sermon zia a chun Pathian thu awi in, Kochuam ah min a ziklut a, Lailong khua ah Pathian thu paw lut masapen a hung hitai. Zialaichun, Sawlchak te le Chanchinpha gen in a hung lut pantau a, Pi Ngaichin chu Pathian thu awi masapen a hung hikit hi.

Biak In masapen chu kum 1914 a khawnâk lam ah Suaklu bul ah sak a hi. Zia hunlai a puitute chu - Pu Vangkap, Pu Henpum, Pu Awnthang, Pi Ngaichin, Pi Luoiting, leh Pu Lamzapau te a hui hi. Da um tak in Pathian thu awi leh awilo te kal a kihiatthiam lo na um zia in, awilo ten Biak In ala hal ui. A haltu hawl ding a tiu leh Hausapu'n, "Pathien min in ngaidam hitiu" a ti zia in a ngaidam thiang kei mai tau. Zia, kingaidam tuana zia

chun, mipite'n Pathian thu a awi vek tau hi. Gangte Bial a "Khawzang a Pathian thu awi masapen" a hung hi khawlaw tau hi.

1916 kum in, Sawlchak Thangler makai na'n a mun ma ah Biak In sak zaw a hikit tai. Christmas a mang pan tau a, Hausapu Suongvang in Sialchal nau 5 nei in Pathian min in Ankuang a siam a. Pu Songvang Gangte Hausa Pathian thu awi masapen leh Christmas Sial ah Ankuang

siam masapen ah Kochuam record a hi kit hi.

Pu Suongvang chapa panina Pu Thongzakham in Gangte pau in New Testament 1953 - 1954 kum in ala letdawk hi. Kochuam in vawk a vak ua, zia chu kipuak in Silchar ah Typewriter a va chaw'u

a, zia mangcha chun Bible a hun letdawk zo thei hi. Bible Society of India in le kipakpina Certificate a piau hi. English leh Mizo Bible ala en a, Hmar Bible letdawkto Dr. Thanglung leh Vaiphei Bible letdawk masa Pu Siakzalam le ala hopi masa a hi.

LAILONG (L) KOCHUAM AH MI MASA (WORKERS)

1. Pastor masapen: Pastor Vangzadal hi 1951 kum a Synod Khawmpi a Ordained a hi.
2. Evangelists (Sawlchakte):
 - Tawnpa (Sawlchak masapen 1915),
 - Thangler (1916 - 1923 chan Lailong (L) ah ala um a, la 60 lam phuaktu a hi),
 - Dengkung, Khuplet, Zawmpau leh
 - Phungkhokhai (KNP te chawp) te a hiu.
3. Kochuam Upate:
 - Upa Lalkhosiem,
 - Upa Phungkhokhai,
 - Upa Kambawi,
 - Upa Khaikhothang leh
 - Upa Mangminthang.
4. Mission School pute:
 - Pastor Vangzadal,
 - Pu Dalgo, Pu Jamkhokam,
 - Pu Zamgen, Pu Lamzathang,
 - Pu Suonkhomang, Pu Thangkholal,
 - Pu Tawnga, Pu Ngulkhomang leh
 - Pu Lalthuom.

HINNA VÂK

Lailong (L) khua ahin La lam a talent nei hawi tak tak le ala um ui. Amau chu Evan. Zawmpau (Khovel Pathien tam mah le le, Jacob guolpha leh a leisang, Singcha gamlei kasal tanna), Evan. Thangler (Ginna tha a leng in), Upa Mangminthang (Thepna tui fawn, Aw Lal Isu nang ngei hung leng kit in), Tual Upa Paulal (Kalvary lampi kakhuol zinna lampi hi, Aw Lal Pathien bangkim siemtu), leh Pu Lienkothang te ahiu.

Lailong (L) Hausa, Kochuam

mipi leh Kochuam Committee ten kilung tuak tak ah Mizoram Presbyterian Kochuam zawm dingah thupukna a siam uh chu bawzui in, May 12, 2019 ni'n Rev. C. Lalrinliana in lak lut na a nei tai. Mizoram Presbyterian Church Synod (Manipur Area) Tanggam Presbytery Kikhawmpi 10 - veina thupukna dungzui in, February 20, 2022 (Pathianni) ni'n Rev. Thanglianlal, Moderator in Lailong (L) Branch Church chu Kochuam piting in a lalut hi.

Lailong (L) Kochuam piting a lalut ahi hun ah Kochuam Committee te:

Chairman	: Upa Mangboi
Vice-Chairman	: Tual Upa Ngulkholal
Secretary	: Tual Upa Songkhogin
Asst. Secretary	: Pu Khailalven
Treasurer	: Tual Upa Paulal

Lailong L. Kochuam Statistic

Pawsal	25
Numei	29
Inzat	8
Danjou kim	30

Report petu,
Rev. Lallunglian Vaiphei
i/c Leijangphai Pastor Bial

March 2022

KOCHUAM AH LAWPLUT THAK

*P*athian mapuina zalin i kochuam hungbel thak zelding i neithe i ua kipak a um ma ma hi.

C. MUNKOT Christian Church chu Lamka North Presbytery ah Lamka Pastor Bial in a chiata Ni 31/01/2022 (Seppatni) a khan Programme siam in, Bialtu Pastor Rev. Vanlalchhuanga in Lawplutna leh Branch Church ah hawwna a nei hi.

Hausapu Pu Holsei Baite in ankuang a siam a kipak takin ankuang umkhawm a hi.

Branch Church hi Hilltown Kochuam in enkawl ding ahii.

C. Munkot Kochuam dinmun tangpi:

1. Inkuan - 40+
2. Pawsal zat - 84
3. Numei zat - 80
- Gawpkhawp - 164
4. Piting - 98
5. Naupang - 66
6. Kochuam Upa - Neilo.

Report petu.
Upa Genlallian
Secretary Sr. Lamka Pastor Bial.

Editor : Rev. S. Lama Vaiphei, Co-ordinator
Joint Editors : Rev. P.B Zosaphara, A/S
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Chinglalven, Secretary, CKNP
 : Tv. Lianlalsiam, Secretary, CKKP

Business Manager : Pu Lalbiaklian, A/S Office.
 MPCS Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *ehinnavak@gmail.com*

Kum khat lak man : Rs. 100.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. PASTORAL MINISTRY	04
4. KHANGLAITE LEH TAIMATNA	10
5. SERMON	
a) Kipan inla maicham siam in	13
b) Pumkhat hidin Jesu'n ei dawtpiak	16
c) Pathian thu zawm	19
d) Pauchap	21
e) I chennau in ding chu vangam a hi	24
f) Lalpa huipei a hat taluai	29
6. Lailong (L) kochuam chanchin	33
7. Kochuam ah lawplut thak	36

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Lawplut thak Kochuam,
C.Munkot leh a enkawltu ding
Hilltown Kochuam te â ding in
Pauchap hitiu.
2. Mipi thasang ah Manipur Inpi
ah ei dinpiak ding puitu i têldaw
thakte'n Pathian lâu zing kawm
ah vai a hun hawm theina
dinguh leh a zâwng a hau
khenchuam neilo ah thudik dinpi
ding ah hangsanna a neina ding
un dawtpiak hitiu.

KHRISTIAN KHANGLAI PAWL
 GENERAL CONFERENCE 12-VEINA 2022

Amun - Hill Town Kochuam

Ahun - May 13-15, 2022

Thupi - "La gam hung tung hen" (Matthai 6:10)

Speaker - Rev. Joseph Lalnunmawia

Note:

KKP General Conference hun ding ah kiguatsa kha MLA
 election vote sim leh result puandaw hun tawh a kituak
 khâk ziak in Central Committee chun ziagual a hin a hung
 lemguat thak a hi.